

# 1 Johana

**JANDIKO:** Jaote Johana

**KAR NDIKO:** Ok ong'ere to onyalo bedo Efeso

**KINDE NDIKO:** 85-96 E YIK RUOTH (AD)

**WECHE MANIE IYE:**

Barua mar osiepni ne ondik gi Jaote Johana kane en ng'ama hike ng'eny ne jo-Kristo mane ogeno ahinya. Ondiko ka oluongogi ni nyithinda matindo kendo omiyo-gi puonj mar dak mapile kaka jo- Kristo. Ochako puonj ka oleronigi malong'o kuom nyuol mane onyuolgo Yesu e ringruok kendo ogero chikene e adier ni jogo mong'eyo Yesu ong'eyo Wuoro bende. To jogo maok ong'eyo Yesu ok ong'eyo Wuoro, to bende ok ging'eyo hera mar Wuoro kata matin. Jo- Kristo to oserwako kendo ong'eyo hera Nyasaye e kit ngimagi nikech Nyasaye en hera, omiyo onge tiende mondo gibed gi luoro e ngima masani kata e ngima mabiro.

**THORRO:**

Johana medo puonjo ahinya e baruani kuom adiera mar yie ja-Kristo mondo oho kendo ojiw nyithinde kuom yie. Wach maduong' ka en hera, weyo richo, lalruok, loyo richo, bedo gadiera, bedo maler kod ngima mochwere oket kanyakla e chenro maber marieny gi ler mar Nyasaye e piny motimo mudho.

**WECHE MOCHAN KAE GIN.**

1. Lalruok mar ja- Kristo gi Nyasaye (1:1-10)
2. Chik manyien mondo Waherre (2:1-17)
3. Siem kuom joma kwedo Kristo kod timbe maricho (2:18-29)
4. Kaka ja- Kristo onego odagi (3:1-24)
5. Jopuonj mag miriambo (4:1-6)
6. Hera mar Nyasaye (4:7-21)
7. Locho mar yie (5:1-21)

## Is Wach Mar Ngima

**1** Wandikonu kuom Wach mar ngima, mane nitie nyaka aa chakruok, ma wasewinjo kendo waseneno gi wengewa, kendo waserange maber mi wamule gi lwetewa. <sup>2</sup>Ngimani nofwenyore mi ne wanene omiyo wawuoyo kuome, kendo wanyisou wach ngima mochwere mane niggi Wuoro kendo mane onyiswa. <sup>3</sup>Wahulonu gima waseneno kendo winjo, mondo un bende ubed e achiel kodwa e lalruok. To lalruok marwa nie kindwa gi Wuoro kod Wuode, Yesu Kristo. <sup>4</sup>Wandikonu wachni mondo morwa obed mogundho kendo moromo chuth.

## Wuotho E Ler

<sup>5</sup>Puonj mane wayudo kuom Kristo kendo koro wanyisou ema: Nyasaye en ler, kendo mudho onge kuome chutho. <sup>6</sup>Omiyo ka wawacho ni wan e lalruok kode to pod wawuotho e mudho to wariambo kendo ok wawuothi e adiera. <sup>7</sup>To ka wawuotho e ler, kaka en bende enie ler to wan e lalruok ng'ato gi ng'ato, kendo remb Yesu Wuode pwodhowa e richo duto.

<sup>8</sup>Ka wawacho ni waonge richo, to wawoundore kendwa, kendo adiera onge e iwa. <sup>9</sup>To ka wahulo richowa, en jaadiera kendo ng'ama kare kendo obiro weyonwa

richowa mi opuodhwa kuom timbe duto maok odhi kare. <sup>10</sup>Ka wawacho ni pok watimo richo to wamiyo odoko ja miri- ambo kendo wachne onge gi thuolo e ngimawa.

**2** Nyithinda mahero, andikonu wachni mondo kik utim richo. To kapo ng'ato otimo richo, to wan gi Jabura malosonwa kendo kwayonwa Wuoro; Jali en Yesu Kristo, Ng'at Makare. <sup>2</sup>En e misango magolo richowa, to ok marwa kende, to nyaka richo mar piny ngima.

<sup>3</sup>Ka wamako kendo watimo chike Nyasaye eka wabedo gi ratiro ni wang'eye. <sup>4</sup>To ng'at mawacho ni "Ang'eye" to ok tim gima ochiko en jamiriambo kendo adiera onge e iye. <sup>5</sup>To ka ng'ato ang'ata momako kendo orito chik Nyasaye to hera mar Nyasaye nenore kuome ratiro. Yo mwanyalo bedogo gadiera ni wan ei Nyasaye ema: <sup>6</sup>Ng'at mawacho ni en ei Nyasaye nyaka kit ngimane mapile chal gi mar Yesu.

<sup>7</sup>Joherana, chik ma andikonuni ok nyien. En chik onogono machon musebedogo nyaka chakruok. Chik machonno en e wach ma usewinjo. <sup>8</sup>To kata kamano, andikonu chik manyien kendo adierane nenore kuom Kristo kendo e ngimau, nikech mudho aa to ler maradier koro rieny.

<sup>9</sup>Ng'ato ang'ata ma wacho ni wuotho e ler to osin gi owadgi pod osiko e mudho. <sup>10</sup>Ng'at mohero owadgi to odak e ler, kendo ng'ama kamano onge obadho kuome manyalo miyo ochwanyre. <sup>11</sup>Ng'at mosin gi owadgi to nie mudho, kendo mudho nogo ema owuothoe, kokia kuma odhiye, nikech mudho odino wang'e. <sup>12</sup>Andikonu un nyithinda mageno nikech osewenu richou, kuom nyinge. <sup>13</sup>Andikonu un wuone nikech ung'eyo Jalo mane nitie nyaka aa chakruok. Andikonu, joma tindo, nikech useloyo ng'ama rach. Andikonu un nyithindo mageno nikech ung'eyo Wuoro. <sup>14</sup>Andikonu un wuone, nikech ung'eyo

Jalo mane nitie nyaka aa chakruok. Andikonu un yawuowi matindo, nikech utegno, kendo wach Nyasaye odak e iwu kendo useloyo ng'ama rach.

### Kik Uher Piny

<sup>15</sup>Kik uher piny kata gimoro amora manie pinyini. Ka ng'ato ang'ata ohero piny, to hera mar Wuoro onge e iye. <sup>16</sup>Nimar gik moko duto manie piny, kaka gik maricho ma waneno kendo wagombo kod sunga ma ji sungorego kuom gik ma gin go, ok aa kuom Wuoro, to gia e piny. <sup>17</sup>Piny gi gombo duto mag piny nokadhi, to ng'at ma timo dwach Nyasaye nobed mangima nyaka chieng'.

### Siem Kuom Wasik Kristo

<sup>18</sup>Nyithinda mageno, giko chiegni kendo kaka usewinjo ni jasik Kristo biro, koro wasik Kristo mathoth osefwenyore: Ma e kaka wang'eyo ni giko chiegni. <sup>19</sup>Chutho, jogi ne oa irwa to ne ok gin jowa. Nikech ka dine gin jowa to dine gisiko kodwa, nimar dhigino nyiso ayan- ga maler ni onge kata ng'ata achiel kuom- gi mane ng'atwa.

<sup>20</sup>Unto Roho Maler owirou omiyo ung'eyo adiera. <sup>21</sup>Omiyo koro andikonu ok nikech ukia adiera, to nikech ung'eye, kendo nikech ung'eyo ni onge miriambo mawuok e adiera. <sup>22</sup>Ja miriambo to kara en ng'a? En ng'ama wacho ni Yesu ok en Kristo. Jalno e Jasik Kristo, nikech odagi Wuoro kaachiel gi Wuowi. <sup>23</sup>Ng'ama odagi Wuowi odagi Wuoro bende, to ng'ama orwake niggi Wuoro bende.

<sup>24</sup>Kuom mano, neuru ni urito gima ne ukuongo winjo e chunyu. Ka usiko ukano gimane uwinjo mokwongo e chunyu, to ubiro siko e winjruok gi Wuowi kod Wuoro. <sup>25</sup>To ma e gima Kristo owuon nosingore ni nomiwa, ma en ngima mokwore.

<sup>26</sup>Andikonu wehegi kuom jogo mate- mo mondo owuondu. <sup>27</sup>To ne un, ma Roho Maler owirou kendo odak e iwu, ng'ato ok onego puonju. To kaka Roho

museyudono puonjou kuom gik moko duto, kendo dak ma Roho odak godo e iwu en adiera maok miriambo mana kaka osepuonjouno, sikuru kuome.

### Nyithind Nyasaye

<sup>28</sup>Omiyo koro nyithinda mageno, sikuru kuome mondo ka ofwenyore to wabed gi chir kendo maonge wichkuot e nyime ka obiro.

<sup>29</sup>Ka ung'eyo ni Kristo en ng'ama kare to onego ung'e bende ni ng'ato ka ng'ato matimo gima kare en nyathi Nyasaye.

**3** Mano kaka hera ma Wuoro oherowago duong' mondo oluongwa ni nyithind Nyasaye. Kendo mano e gima wan! Gimomiyo piny, ok ong'eyowa en nikech piny ne ok ong'eye. <sup>2</sup>Osiepena mageno koro wan nyithind Nyasaye, to kaka wabiro bedo achien pok onyiswa. To wang'eyo ni ka Kristo nofwenyore, to wan-abed machal kode, nikech wananene kaka ochal. <sup>3</sup>Ng'ato ang'ata man- gi genoni pwodhore owuon mondo osik koler mana kaka en bende oler.

<sup>4</sup>Ji matimo richo ketho chik; chutho, richo en ketho chik <sup>5</sup>To ung'eyo ni Kristo nofwenyore mondo ogol richowa. Ung'eyo bende ni richo onge kuome. <sup>6</sup>Ng'at man kuom Kristo ok sik katimo richo. Ng'at mosiko timo richo pok onene kendo okiaye.

<sup>7</sup>Nyithinda mageno , kik uyie ng'ato owitu. Ng'at matimo gima kare en ng'ama kare, mana kaka En bende en Ng'ama kare. <sup>8</sup>Ng'at mosiko timo richo en ng'at Jachien, nikech Jachien osebedo ka timo richo nyaka a chakruok. Gimomiyo Wuod Nyasaye nobiro ne en ni mondo oketh tich Jachien. <sup>9</sup>Ng'ama Nyasaye onyuolo ok nyal dhi nyime katimo richo, nikech kit Nyasaye osiko kuome. Ok onyal timo richo nikech Nyasaye ema onyuole. <sup>10</sup>Kaka wanyalo ng'eyo pogruok manie kind nyithind Nyasaye gi nyithind Jachien e magi: Ng'at ma ok tim gima kare ok en nyathi Nyasaye, kata ng'ama

ok ohero owadgi.

### Herreuru Ng'ato Gi Ng'ato

<sup>11</sup>Wach mane uwinjo nyaka aa mokuongo ema: Nyaka waherre ng'ato gi ng'ato. <sup>12</sup>Kik wachal gi Kain mane en koth Ng'ama Rach, omiyo nonego owadgi ma hie. To nonego owadgi nang'o? Nikech timbene ne richo, to timbe owadgi ne kare. <sup>13</sup>Kuom mano, owetena kik ubwogi ka jopiny sin kodu. <sup>14</sup>Wang'eyo ni wasekalo waa e tho mi wadonjo e ngima, nikech wahero owetewa. Ng'ama ok ohero owadgi osiko e tho. <sup>15</sup>Ng'ama osin gi owadgi en janek, to ung'eyo ni janek onge gi ngima mochwere

<sup>16</sup>Ma e kaka wang'eyo gima hera en; Kristo nochiwonwa ngimane. Wan bende onego wachiw ngimawa ni owetewa. <sup>17</sup>Ka ng'ato jamoko to oneno owadgi kochando to ok okeche, ere kaka ng'ama kamano nyalo wacho ni en gi hera mar Nyasaye? <sup>18</sup>Nyithinda mageno kik wawach mana gi dhowa ni wahero ji, to waher ji gi tim kendo gi adiera. <sup>19</sup>Mano e yo mwa ng'eyogo ni wachung' e adiera, kendo mabiro miyo chunywa bed gi chir e nyim Nyasaye <sup>20</sup>saa moro amora ma chunywa ng'adonwa bura. Nimar Nyasaye duong' molooyo chunywa, kendo ong'eyo gik moko duto.

<sup>21</sup>Omiyo, osiepega mageno, ka chunywa ok ng'adnwa bura to wan gi chir e nyim Nyasaye. <sup>22</sup>To wayudo koa kuome, gimoro amora mwakwaye nikech wamako chikene kendo watimo gik mamore. <sup>23</sup>To ma e chikne: ni mondo wayie e nying Wuode Yesu Kristo kendo mondo waherre ng'ato gi ng'ato, mana kaka Kristo nochikowa. <sup>24</sup>Joma omako kendo orito chike Nyasaye ni kuome to en bende en kuomgi. To ma e kaka wang'eyo ni Nyasaye odak e iwa: Wang'eyo nikech Roho ma osemiyo.

### Pim Chunje

**4** Osiepega mageno kik uyie roho duto, to temgiuru mondo ufweny ka bende

gia kuom Nyasaye nikech jonabi mag miriambo mathoth osetuch e piny koni gi koni. <sup>2</sup>Ma e kaka unyalo ng'eyo Roho mar Nyasaye: Roho ma hulo ni Yesu Kristo nobiro e ringruok en roho moa kuom Nyasaye. <sup>3</sup>to roho moro amora makwedo Yesu ok en roho mar Nyasaye. Chuny ma kama en mar Jasik Kristo ma usewinjo ni biro kendo makoro nie piny kata sani.

<sup>4</sup>Ne un nyithinda mageno, unto un nyithind Nyasaye kendo useloyo jonabi mag miriambo, nikech jal manie iu duong' molooyo jal manie piny. <sup>5</sup>Gin jopiny, omiyo giwuoyo kuom gipinyi kendo piny winjogi. <sup>6</sup>Wan to wan jo Nyasaye omiyo joma ongeyo Nyasaye winjowa, to ng'at ma ok ng'at Nyasaye ok winjwa. Mani e yo mwang'eyogo Roho mar adier gi roho mar miriambo.

### Hera Mar Nyasaye Kod Marwa.

<sup>7</sup>Osipega mageno waherreuru ng'ato gi ng'ato nikech hera aa kuom Nyasaye. Ng'at mohero, ji en nyathi Nyasaye kendo ong'eyo Nyasaye. <sup>8</sup>Ng'at ma ok ohero ji kia Nyasaye, nikech Nyasaye en hera. <sup>9</sup>Nyasaye nonyiso hera moherowago kama: Ne ooro Wuode ma miderma e piny mondo wabed mangima kuome. <sup>10</sup>Ma e gima hera en: ok ni wan ema ne wahero Nyasaye, to ni Nyasaye ema noherowa mi nooro Wuode kaka misango mar richowa. <sup>11</sup>Osipega mageno, ka Nyasaye noherowa matut kamano to wan bende waherre ng'ato gi ng'ato. <sup>12</sup>Onge ng'ama oseneno Nyasaye, to ka waherore ng'ato gi ng'ato to Nyasaye odak e iwa, kendo herane ipuodho chuth e iwa.

<sup>13</sup>Wang'eyo ni wadok ei Nyasaye kendo en bende en eiwa, nikech osemiyoowa Rohone. <sup>14</sup>Waseneno kendo wanyiso ji ni Wuoro oseoro Wuode mondo obed Jawar mar piny. <sup>15</sup>Ka ng'ato ang'ata ohulo ni Yesu en wuod Nyasaye, to Nyasaye odak e iye kendo en bende odak ei Nyasaye. <sup>16</sup>Omiyo koro wang'eyo kendo wageno kuom hera ma Nyasaye oherowago.

Nyasaye en hera. Kendo ng'ato ang'ata mosiko e hera osiko kuom Nyasaye, kendo Nyasaye bende odak kuome. <sup>17</sup>E yo maka ma herawa nyaka nyisre chuth e ngimawa mondo chieng' ng'ado bura wabed gi chir nikech e ngima mar pinyni wachal kode. <sup>18</sup>Onge luoro e hera; hera maradier riembo luoro oko nikech luoro ema kelo kum. Jal man-gi luoro ok puodhre ei Hera.

<sup>19</sup>Wahero nikech Nyasaye noherowa mokuongo. <sup>20</sup>Ka ng'ato wacho ni, "Ahero Nyasaye", to osin gi wadgi to en jamiri-ambo; nikech ng'ama ok ohero wadgi, moseneno gi wang'e, ok nyal hero Nyasaye mapok oneno. <sup>21</sup>Chik ma osemiyoowa en ma: Ng'at mohero Nyasaye nyaka her wadgi bende.

### Yie Kuom Wuod Nyasaye.

**5** Ng'ato ang'ata moyie ni Yesu e Kristo en nyathi Nyasaye, kendo ng'ama ohero Wuoro hero nyathine bende. <sup>2</sup>Ma e kaka wang'eyo ni wahero nyithind Nyasaye: Ka wahero Nyasaye kendo wamako chikene. <sup>3</sup>Ma e kaka ihero Nyasaye: luor chikene. To chikene ok gin ting' mapek <sup>4</sup>nikech ng'at ma Nyasaye onyuolo loyo piny. Ma e locho ma waloyogo piny ma en yiewa. <sup>5</sup>En ng'a molooyo piny? Mana jalo moyie ni Yesu en Wuod Nyasaye

<sup>6</sup>Yesu Kristo e Jal manobiro gi pi kod remo. Nobiro, ok gipi kende, to nobiro gi pi kod remo. Nenoni Roho Maler ema timo, nikech Roho en e adiera. <sup>7</sup>Nimar nitie joneno adek, ma gin: <sup>8</sup>Roho, pi kod remo, kendo jonenogi winjore kuom wachni. <sup>9</sup>Wayie gi nend dhano, to nend Nyasaye ema duong' molooyo nikech en neno ma Nyasaye owuon osewacho kuom Wuode. <sup>10</sup>Ng'at moyie kuom Wuod Nyasaye nigini nenoni e chunye, to ng'ama ok oyie kuom Nyasaye miye odoko jamiri-ambo, nikech odagi yie gima Nyasaye osewacho kaka janeno kuom Wuode. <sup>11</sup>To ma e neno nogo: Nyasaye osemiyoowa ngima mochwere; kendo ngimani nikuom

wuode. <sup>12</sup>Ng'at man gi Wuowi nigi ngima; to ng'at ma onge gi Wuod Nyasaye onge gi ngimani.

### Weche Mogik

<sup>13</sup>Andikonu wehegi, un joma oyie kuom nying wuod Nyasaye, mondo ung'e ni un-gi ngima mochwere. <sup>14</sup>Ma e chir ma wan-go kawadhi e nyim Nyasaye ni ka wakwaye gimoro amora mowinjore gi dwache to owinjowa. <sup>15</sup>To ka wang'eyo ni owinjowa kwakwaye gimoro amora, to wang'eyo ni waseyudo gima wakwayono.

<sup>16</sup>Ka ng'ato oneno wadgi katimo richo maok tere e tho, to owinjore olamne mondo Nyasaye omi jalno ngima. Awuoyo kuom joma richogi ok tergi e

tho. To nitie richo matero ji e tho; ma ok awach ni olamie Nyasaye. <sup>17</sup>Ketho duto gin richo, to nitie richo maok ter ji e tho.

<sup>18</sup>Wang'eyo ni ng'ama Nyasaye onyuolo ok sik katimo richo, nikech Wuod Nyasaye orite kendo Ng'ama Rach ok nyal mule. <sup>19</sup>Wang'eyo ni wan nyithind Nyasaye, kendo ni piny duto nie bwo loch mar Ng'ama Rach. <sup>20</sup>Wang'eyo bende ni Wuod Nyasaye osebiro kendo osemiyowa riekoo mar winjo tiend wach, mondo wang'e Jalo ma jaadiera; Jal makoro wanie iye, ma en wuode Yesu Kristo. En e Nyasaye madier kendo ngima mochwere.

<sup>21</sup>Nyithinda mageno tang'uru ni nyiseche madhano oloso.